

TURISTIČKA ZAJEDNICA
KANTONA SARAJEVO
- Turističko vijeće -

Broj: 426-4/20
Sarajevo, 15.05.2020. godine

Na osnovu člana 70. stav 3. tačka (e), te člana 24. stav 3. tačka (e) Statuta Turističke zajednice Kantona Sarajevo („Službene novine Kantona Sarajevo“ broj: 32/17), Turističko vijeće Turističke zajednice Kantona Sarajevo na nastavku 9.(devete) sjednice održane dana 15.05.2020. godine, koja je započeta 30.04.2020. godine, donosi

ODLUKU
o usvajanju Pravilnika o sufinansiranju
projekata od značaja za turizam u Kantonu Sarajevo

Član 1.

Usvaja se Pravilnik o sufinansiranju projekata od značaja za turizam u Kantonu Sarajevo.

Član 2.

Stupanjem na snagu ovog Pravilnika prestaje da važi Pravilnik o sufinansiranju turističkih projekata u Kantonu Sarajevo broj: 416/19 od 02.04.2019. godine.

Član 3.

Sastavni dio ove Odluke čini Pravilnik o sufinansiranju projekata od značaja za turizam u Kantonu Sarajevo.

Član 4.

Ova Odluka stupa na snagu danom donošenja.



Dostaviti:

1. Predsjedniku i članovima Turističkog vijeća
2. Arhiva Turističkog vijeća

TURISTIČKA ZAJEDNICA KANTONA SARAJEVO

**PRAVILNIK
O SUFINASIRANJU PROJEKATA OD ZNAČAJA ZA TURIZAM U
KANTONU SARAJEVO**

Sarajevo, maj 2020. godine

Na osnovu člana 70. stav 3. tačka e) Zakona o turizmu Kantona Sarajevo („Službene novine KS“, br. 19/16, 31/17 i 34/17), člana 24. stav 3. tačka e) Statuta Turističke zajednice Kantona Sarajevo („Službene novine Kantona Sarajevo“ broj 32/17), a na prijedlog Predsjednice Turističke zajednice Kantona Sarajevo, Odlučilo Turističko vijeće Turističke zajednice Kantona Sarajevo na nastavku 9. sjednice koja je održana dana 15.05.2020. godine donosi:

Pravilnik o sufinansiranju projekata od značaja za turizam u Kantonu Sarajevo

I Predmet pravilnika

Član 1.

Ovim Pravilnikom propisuje se način odobravanja projekata od značaja za Turističku zajednicu Kantona Sarajevo, odnosno od značaja za promociju, razvoj i unapređenje turizma Kantona Sarajevo, dodjela sredstava, subjekti/korisnici sredstava, vrste programa, izgled i sadržina obrazaca za prijavu na javni poziv, dokumentacija koja se uz prijavu za javni poziv dostavlja, sadržina i izgled izvještaja o realizaciji projekta i način praćenja realizacije odobrenih projekata.

Uređuju se uslovi i pravila odobravanja finansijskih sredstava u svrhu sufinansiranja turističkih projekata, korisnici i vrste projekata za koje se mogu odobriti finansijska sredstva, te nadzor provedbe i korištenja sredstava koje Turistička zajednica Kantona Sarajevo dodjeljuje fizičkim i pravnim licima koji sprovode projekte promocije, razvoja i unapređenja turizma Kantona Sarajevo.

II Sredstava sufinansiranja

Član 2.

Turistička zajednica Kantona Sarajevo u svom godišnjem Finansijskom planu i Programu rada planira i obezbjeđuje sredstva za sufinansiranje projekata za promociju, razvoj i unaprijeđenje turizma Kantona Sarajevo.

Sredstava iz prethodnog stava se raspoređuju, u toku kalendarske godine, na osnovu provednog javnog poziva i na osnovu pojedinačnih davanja, i to odlukama: predsjednika Turističke zajednice Kantona Sarajevo za javne pozive, Turističkog vijeća Turističke zajednice Kantona Sarajevo i zaključkom Vlade Kantona Sarajevo isključivo za projekte u kojima je sufinansijer.

Turistička zajednica Kantona Sarajevo sufinansira turističke projekte u Kantonu Sarajevo na sljedeće načine:

1. u saradnji s Vladom Kantona Sarajevo;
2. putem Javnih poziva;
3. kroz odluke Turističkog vijeća Turističke zajednice Kantona Sarajevo za projekte koji dolaze u Turističku zajednicu Kantona Sarajevo, tokom cijele godine.



III Korisnici sredstava sufinansiranja

Član 3.

Korisnici sredstava sufinansiranja su fizička i pravna lica koja su registrovana za obavljanje turističke djelatnosti ili koja su direktno i indirektno kroz svoje programe, projekte i aktivnosti (turizam, kultura, sport, zaštita i unapređenje životne sredine, edukacija i sl.) usmjerena na promociju, unapređenje i razvoj turizma Kantona Sarajevo

Korisnici sredstava iz prethodnog stava, a koji su obveznici po Zakonu o turizmu Kantona Sarajevo, moraju uredno ispunjavati zakonom predviđene obaveze prema Turističkoj zajednici Kantona Sarajevo i opravdati ranije dodijeljena sredstva.

Korisnici koji su ranije dobili sredstva na jedan od načina sufinansiranja, a čiji utrošak i namjenu nisu opravdali na propisan način, nemaju pravo na sufinansiranje kod Turističke zajednice Kantona Sarajevo.

IV Projekti sufinansiranja u saradnji sa Vladom Kantona Sarajevo

Član 4.

Turistička zajednica Kantona Sarajevo u saradnji sa Vladom Kantona Sarajevo može sufinansirati kapitalne projekte.

Turistička zajednica Kantona Sarajevo može uputiti inicijativu za sufinansiranje projekta prema Vladi Kantona Sarajevo, kada predsjednik Turističke zajednice Kantona Sarajevo i Turističko vijeće ocijene da je dostavljeni projekat od izuzetnog značaja i da bi se njegovom realizacijom ostvarila svrha promocije, razvoja i unapređenja turizma Kantona Sarajevo.

Inicijativa se upućuje Vladi Kantona Sarajevo putem Ministarstva privrede Kantona Sarajevo sa kompletnim projektom i ostalom propratnom dokumentacijom, koja je prošla i zadovoljila proceduru provjere formalno-pravnih uslova.

Vlada Kantona Sarajevo može podnijeti inicijativu Turističkoj zajednici Kantona Sarajevo za sufinansiranje projekata koje ocijeni značajnim za razvoj turizma u Kantonu Sarajevo, a Turistička zajednica Kantona Sarajevo će tražiti da joj se dostavi projekat sa svom potrebnom dokumentacijom od strane potencijalnog korisnika, u skladu sa ovim Pravilnikom.

Nakon što cjelokupna dokumentacija bude prikupljena, dostavlja se Vladi KS, putem Ministarstva privrede KS, na donošenje zaključka.

V Projekti sufinansiranja kroz odluke Turističkog vijeća

Član 5.

Turističko vijeće Turističke zajednice Kantona Sarajevo može donijeti odluku o sufinansiranju projekta, a koji su od značaja za promociju, razvoj i unapređenje turizma Kantona Sarajevo.

Sufinansiranje će se vršiti kroz odluke Turističkog vijeća Turističke zajednice Kantona Sarajevo za projekte koji dolaze u Turističku zajednicu Kantona Sarajevo tokom cijele godine, čija realizacija ne može čekati proceduru objave javnog poziva.

Odluka iz prethodnog stava ovog člana se donosi za svaki projekat posebno, a na temelju prethodnog razmatranja uredno zaprimljenog zahtjeva za sufinansiranje projekta i propratne dokumentacije na protokolu Turističke zajednice Kantona Sarajevo.

 Uz zahtjev za sufinansiranje sa projektom i propratnom dokumentacijom podnosilac zahtjeva mora ispunjavati i uslove propisane ovim Pravilnikom.

Prije samog kandidiranja pristiglih projekata na Turističko vijeće, komisija za ocjenu formalno-pravnih uslova će pregledati pristigle zahtjeve sa dokumentacijom, te ukoliko isti budu kompletni, prosljedit će Turističkom vijeću na razmatranje i odlučivanje.

Ukoliko Komisija za ocjenu formalno-pravnih uvjeta uoči da uz zahtjev nedostaje određena dokumentacija, pozvat će podnosioca zahtjeva da upotpuni dokumentaciju u roku od 15 dana.

Ukoliko podnosilac zahtjeva u ostavljenom roku upotpuni dokumentaciju, formalno-pravna komisija će prosljediti zahtjev sa dokumentacijom Turističkom vijeću na razmatranje i odabir.

Ukoliko podnosilac zahtjeva u ostavljenom roku ne upotpuni dokumentaciju, takav zahtjev smatra se nepotpunim, neće biti predmet daljeg razmatranja i isti će se odbaciti.

VI Sufinansiranje projekata po javnim pozivima

Član 6.

Turistička zajednica Kantona Sarajevo na temelju usvojenog Programa rada i Finansijskog plana za tekuću godinu, raspisuje dva javna poziva, prvi u prvoj polovini godine, a drugi javni poziv u drugoj polovini godine.

Odluku o raspisivanju javnog poziva donosi predsjednik Turističke zajednice Kantona Sarajevo, na način i pod uslovima propisan ovim Pravilnikom.

Javni poziv se objavljuje na zvaničnoj web stranici Turističke zajednice Kantona Sarajevo www.visitsarajevo.ba, na zvaničnim profilima Turističke zajednice Kantona Sarajevo na društvenim mrežama (Facebook i Instagram), kao i u najmanje u jednim dnevnom novinama i na jednom web portalu.

Obavještenje o javnom pozivu iz prethodnog stava mora biti vidljivo sve vrijeme trajanja javnog poziva na web stranici www.visitsarajevo.ba.

Korisnici finansijskih sredstava dodjeljenih od strane Turističke zajednice Kantona Sarajevo biraju se na osnovu objavljenog javnog poziva dostavljanjem zahtjeva za sufinansiranje projekata s ciljem podizanja kvalitete turističke ponude.

Zahtjev za sufinansiranje projekata s ciljem podizanja kvalitete turističke ponude nalazi se u Prilogu I i sastavni je dio ovog Pravilnika.

VII Predmet sufinansiranja temeljem javnog poziva

Član 7.

Javni poziv se raspisuje za programe razvoja i unapređenja turističke ponude i turističkih proizvoda Kantona Sarajevo, razvoja novih turističkih inicijativa i proizvoda iz različitih oblika turizma.



VIII Sadržaj javnog poziva za sufinansiranje projekata

Član 8.

Javni poziv sadrži:

1. Namjena sredstava za ostvarivanje interesa promocije, razvoja i unapređenja turizma Kantona Sarajevo;
2. Iznos sredstava koja su određena za javni poziv;
3. Najmanji i najveći iznos sredstava koja se odobravaju po projektu;
4. Koji subjekti imaju pravo učešća;
5. Kriterijum za ocjenu projekata na osnovu kojih će se dodjeljivati sredstva;
6. Precizne rokove u kojima se javni poziv provodi;
7. Informacija o dokumentaciji koju prilaže podnosilac projekta.

IX Prijava na javni poziv za sufinansiranje projekata

Član 9.

Otvoreni javni poziv za kandidiranje projekata za dodjelu sredstava se blagovremeno objavljuje na zvaničnoj web stranici Turističke zajednice Kantona Sarajevo www.visitsarajevo.ba, u minimalno jednom printanom mediju i na minimalno jednom posjećenijem web portalu.


Javni poziv ostaje otvoren 30 (trideset) dana od dana objavljivanja.

Podnosilac zahtjeva za sufinansiranje projekata s ciljem podizanja kvalitete turističke ponude je dužan da uredno ispuni neizbrisivom tintom obrazac koji je sadržan u Prilogu I ovog Pravilnika, vlastoručno ga potpiše i ovjeri pečatom.

Obrazac za podnošenje zahtjeva za sufinansiranje projekta biće objavljen na web stranici www.visitsarajevo.ba.

Uz obrazac, podnosilac zahtjeva je dužan da dostavi sljedeću dokumentaciju u originalu ili ovjerenoj kopiji kako slijedi:

1. Projekat za koji se traži sufinansiranje sa jasno definisanim ciljevima, rokovima i metodama provođenja projektnih aktivnosti dostavljen u jednom (1) isprintanom originalnom primjerku i jednoj (1) kopiji, u A4 formatu, uvezanih (tvrdim uvezom ili jemstvenikom) i numerisanih stranica;
2. Detaljno razrađen finansijski plan projekta;
3. Dokaz o registraciji subjekta od nadležnog organa (rješenje o upisu u sudski registar za pravne osobe, rješenje nadležnog općinskog organa za fizičke osobe), ne stariji od 90 dana;
4. Uvjerenje o poreznoj registraciji (ID broj, PDV broj ukoliko je podnosilac zahtjeva PDV obveznik, te dokaz o izmirenim poreznim obavezama UIO i dokaz o izmirenim poreznim obavezama iz nadležne Porezne uprave), ne starije od 90 dana;
5. Potvrda banke o postojanju transakcijskog računa sa naznačenim brojem računa ili karton deponovanih potpisa podnosioca zahtjeva;
6. Izjava ovlaštene osobe ili fizičkog lica da je obezbijedio materijalne, kadrovske i tehničke uslove za realizaciju projekta, svojeručno potpisna i ovjerena pečatom.
7. Dokaz da protiv podnosioca prijave i lica ovlaštenog za zastupanje, pred sudovima na području BiH nije podignuta optužnica, odnosno da nije potvrđena optužnica, niti je izrečena osuđujuća presuda za krivično djelo (uvjerenje općinskog suda); da se ne vodi prekršajni postupak



(uvjerenje općinskog suda); da nije osuđivan (uvjerenje MUP-a). Dokazi ne smiju biti stariji od 6 mjeseci.

Za svaki projekat podnosilac prijave mora osigurati vlastito učešće u minimalnom iznosu od 15% od ukupne vrijednosti projekta.

9. Turistička zajednica Kantona Sarajevo od podnosioca zahtjeva može zahtijevati dostavljanje dodatne dokumentacije ukoliko procijeni da je to potrebno (npr. bankovna garancija i dr.)

X Predaja prijava na javni poziv za sufinansiranje projekata

Član 10.

Prijave se predaju lično u službene prostorije Turističke zajednice Kantona Sarajevo ili preporučenom poštom, u zatvorenoj koverti A4 formata na čijem omotu se nalazi čitkim slovima ispunjen naziv podnosioca zahtjeva, adresa i naznaka na koji javni poziv se prijavljuje.

Podnosilac zahtjeva na javni poziv u kalendarskoj godini za sufinansiranje može kandidirati isključivo jedan (1) projekat.

Izuzetno, na način i pod uslovima propisanim ovim Pravilnikom, može se odobriti sufinansiranje za isti projekat dvije kalendarske godine uzastopno, ukoliko realizacija projekta nije moguća u jednoj kalendarskoj godini ili ukoliko je njegovo ponavljanje opravdano i od izuzetnog značaja za razvoj turizma u Kantonu Sarajevo.

Subjekti koji nisu opravdali ranije dobijena sredstva, neće biti razmatrani za sufinansiranje propisano ovim Pravilnikom.

XI Kriteriji za ocjenjivanje i odabir projekata bez obzira na način sufinansiranja

Član 11.

Kandidirani projekti na osnovu ovog Pravilnika ocjenjuju se prema sljedećim kriterijima/mjericima:

1. Kvalitet kandidiranih projekata (inovativnost, razvoj novih turističkih proizvoda, važnost projekta za lokalnu zajednicu, zastupljenost projekta na području cijelog Kantona Sarajevo, praćenje trendova Svjetske turističke organizacije);
2. Doprinos uspješnom prezentiranju i afirmaciji Kantona Sarajevo kao turističke destinacije u zemlji i inostranstvu (vidljivost, planirane promotivne aktivnosti, dostupnost turistima i posjetiocima, učešće renomiranih stručnjaka iz oblasti projekta kojim se aplicira, dodatni sadržaj u turističkoj ponudi Kantona Sarajevo);
3. Jasno definisani ciljevi provođenja projektnih aktivnosti (ciljevi trebaju biti SMART – Specific-Measurable-Achievable-Relevant-Timely, odnosno jasno određeni i specifični, mjerljivi, ostvarivi, relevantni i vremenski definisani; mjerljivi očekivanim brojem turista, noćenja, posjetilaca, prihoda od turizma, povratnih pozitivnih efekata na razvoj i unapređenje turizma);
4. Kontinuitet projekta i dosadašnji rezultati (dužina trajanja projekta, održivost, samoodrživost, inventivnost i mogućnosti unapređenja projekta, rezultati iz prethodnih godina ukoliko postoje);

5. Subjekti koji su ili nisu ranije sufinansirali iz sredstava Turističke zajednice Kantona Sarajevo, biće bodovani na sljedeći način:

5.1. Subjekt koji nikada ranije nije sufinansiran po javnim pozivima, niti po drugim osnovama od strane Turističke zajednice Kantona Sarajevo u prethodne tri godine, bit će bodovan sa 5 boda;

5.2. Subjekt koji je sufinansiran iz sredstava Turističke zajednice Kantona Sarajevo manje od dva puta u prethodne tri godine, bit će bodovan sa 3 boda;

5.3 Subjekt koji je sufinansiran iz sredstava Turističke zajednice Kantona Sarajevo dva ili više puta u prethodne tri godine neće dobiti bodove po ovom osnovu;

Član 12.

Svaki od kriterija/mjerala iz prethodnog stavka ocjenjuje se sa 0 – 5 bodova.

Maksimalan broj bodova koji podnosilac zahtjeva može ostvariti po projektu iznosi 25 bodova.

XII Komisije za odabir projekata

Član 13.

Postupak po javnom pozivu provode dvije Komisije:

1. Komisija za utvrđivanje ispunjenosti formalno-pravnih uslova i
2. Komisija za stručno ocjenjivanje projekata.

Komisije iz stava 1. i 2. ovog člana se imenuju posebno za svaki javni poziv rješenjem predsjednika Turističke zajednice Kantona Sarajevo. Rješenjem o imenovanju članova Komisije utvrđuju se njihov sastav, djelokrug, prava i obaveze.

Turistička zajednica Kantona Sarajevo će uputiti dopis Uredu za borbu protiv korupcije i osiguranje kvaliteta KS da imenuje osobu, koja će biti supervizor tokom cijelog procesa.

XIII Komisija za utvrđivanje ispunjenosti formalno-pravnih uslova

Član 14.

Komisija za utvrđivanje ispunjenosti formalno-pravnih uslova ima tri člana, od kojih su dva iz reda zaposlenika pravne i ekonomske struke Turističke zajednice Kantona Sarajevo, a jednog člana delegira Turističko vijeće Turističke zajednice Kantona Sarajevo iz svog sastava.

Komisija za utvrđivanje ispunjenosti formalno-pravnih uslova dužna je prije početka procesa pregleda dokumentacije zatražiti listu subjekata koji nisu opravdali dobijena sredstva po ranijim pozivima ili sufinansiranju iz Turističke zajednice KS.

XIV Komisija za stručno ocjenjivanje projekata

Član 15.

Komisija za stručno ocjenjivanje projekata ima pet članova i sekretara koji nema pravo glasa, od kojih su dva člana i sekretar iz reda zaposlenika, koje imenuje predsjednik Turističke zajednice Kantona Sarajevo, dva člana su eksperti iz različitih oblasti (u zavisnosti od predmeta javnog poziva; angažovani ugovorom o

djelu) i jedan član kojeg delegira Turističko vijeće iz svog sastava. Dva eksperta će predložiti predsjednik TZ KS zajedno za Turističkim vijećem. Eksperti mogu biti ili sa liste ovlaštenih sudskih vještaka (arhitektonske, građevinske, ekonomske struke, itd. u zavisnosti od prirode projekta) ili će biti objavljen javni poziv za dostavu biografija eksperata za oblast za koju bude isti nužan.

Predsjednik Turističke zajednice KS ima pravo prisustvovati zasjedanju Komisije za stručno ocjenjivanje projekata bez prava glasa.

Ekspertne članove i predsjednika komisije imenuje rješenjem o imenovanju predsjednik Turističke zajednice Kantona Sarajevo.

Članovi Komisije su prije početka rada dužni potpisati izjavu o nepostojanju sukobu interesa koja podrazumijeva da član komisije:

1. nije lično i/ili članovi njegove porodice (bračni ili vanbračni drug, dijete, roditelj, brat ili sestra) nisu vlasnici, rukovodioci, zaposlenici, članovi ili članovi upravnog tijela kod podnosioca prijave;
2. nije na bilo koji način povezan sa podnosiocem prijave kod drugih lica (partnerski odnos i sl.);
3. nema materijalni ili lični interes u projektima koje ocjenjuje.

XV Procedura nakon isteka roka za dostavljanje zahtjeva po javnom pozivu za sufinansiranje projekata

Član 16.

Nakon isteka roka za podnošenje zahtjeva po javnom pozivu za sufinansiranje projekata, sve pristigle kovertе dostavljaju se neotvorene Komisiji za utvrđivanje ispunjenosti formalno-pravnih uslova.

Komisija za utvrđivanje ispunjenosti formalno-pravnih uslova će po prijemu koverti pristupiti provjeri blagovremenosti zaprimljenih koverti.

Neblagovremne prijave i prijave koje nisu dostavljene lično ili preporučenom poštom, Komisija za ocjenjivanje formalno-pravnih uslova neće uzeti u razmatranje.

Blagovremeno dostavljene kovertе, Komisija za ocjenjivanje formalno-pravnih uslova će evidentirati na način da će napisati ime i prezime podnosioca zahtjeva, naziv projekta i datum zaprimanja koverata, a zatim će pristupiti provjeri formalno-pravnih uslova dostavljenih uz obrazac za prijavu na javni poziv.

Komisija za utvrđivanje ispunjenosti formalno-pravnih uslova sastavlja zapisnik o svome radu, koji sadrži spisak podnosioca zahtjeva koji nisu blagovremeno dostavili prijave, spisak podnosioca zahtjeva koji su dostavili blagovremeno prijave, ali nisu ispunili formalno-pravne uslove, te spisak podnosioca zahtjeva koji su blagovremeno dostavili prijave i prateću dokumentaciju sa projektom koji zadovoljavaju formalno-pravne uslove.

Komisija za utvrđivanje ispunjenosti formalno-pravnih uslova dostavlja Komisiji za stručno ocjenjivanje prijava izvod iz zapisnika podnosioca zahtjeva koji su blagovremeno dostavili prijave i prateću dokumentaciju sa projektom koji zadovoljavaju formalno-pravne uslove na dalje postupanje.



XVI Bodovanje projekata po javnom pozivu za sufinansiranje

Član 17.

Komisija za stručno ocjenjivanje prijava vrši analizu i bodovanje prijava koje ispunjavaju formalno-pravno uslove na sljedeći način:

1. od 0 do 5 bodova – 0% sredstava;
2. od 6 do 10 bodova – do 30% traženih sredstava za sufinansiranje;
3. od 11 do 15 bodova – do 50% traženih sredstava za sufinansiranje;
4. od 16 do 20 bodova – do 80% traženih sredstava za sufinansiranje;
5. od 21 do 25 bodova- do 100% traženih sredstava za sufinansiranje.

XVII Nadležnost predsjednika Turističke zajednice nakon dostavljanja zapisnika Komisije za stručno ocjenjivanje prijava

Član 18.

Komisija za stručno ocjenjivanje prijava o svom radu dužna je da sačini zapisnik koji sadrži prijedloge projekata sa rang listom prikazanog traženog iznosa sredstava za sufinansiranje pojedinačnih projekata i ostvarenim brojem bodova. Nakon završetka procesa ocjenjivanja, Komisija je dužna sačiniti detaljan izvještaj o svom radu.

Izvještaj i zapisnik iz prethodnog stava ovog člana Komisija za stručno ocjenjivanje prijava dostavlja predsjedniku Turističke zajednice Kantona Sarajevo na dalje postupanje.

Predsjednik Turističke zajednice Kantona Sarajevo razmatra dostavljenu rang listu sa prijedlogom iznosa i ostvarenim brojem bodova. Predsjednik Turističke zajednice nema pravo mijenjati rang listu i iznose određene od strane Komisije za stručno ocjenjivanje.

Predsjednik Turističke zajednice Kantona Sarajevo može prihvatiti iznos i bodovanje izvršeno od strane Komisije za stručno ocjenjivanje prijave, u kom slučaju donosi Odluku o odabiru korisnika za sufinansiranje projekata po javnim pozivima.

Predsjednik Turističke zajednice Kantona Sarajevo može zatražiti pisanim putem dodatna objašnjenja od Komisije za stručno ocjenjivanje prijava, ukoliko iz zapisnika ne proizilazi dovoljno podataka na temelju kojih bi predsjednik mogao donijeti Odluku o odabiru korisnika za sufinansiranje po javnim pozivima.

Predsjednik Turističke zajednice Kantona Sarajevo može posebnom Odlukom odbiti dostavljenu rang listu, odnosno njen dio, u skladu sa dostavljenim detaljnim izvještajem Komisije za stručno ocjenjivanje prijave ukoliko utvrdi da bi Odluka o odabiru korisnika za sufinansiranje projekata po javnim pozivima donesena na osnovu takve liste za posljedicu imala potpisivanje ugovora štetnih po rad i ugled Turističke zajednice Kantona Sarajevo ili za koje smatra da neće doprinijeti rastu, razvoju i unapređenju turističke ponude u KS.

Odluka o odabiru korisnika za sufinansiranje projekata po javnom pozivu sa dodjeljenim iznosima, biće objavljena na web stranici Turističke zajednice Kantona Sarajevo www.visitsarajevo.ba u roku od tri dana od dana donošenja odluke i na istoj će stajati najmanje 30 dana od dana objavljivanja.

XVIII Obaveze korisnika odobrenih sredstava

Član 19.

Subjekti kojima su odobrena sredstva dužni su dostaviti izvještaj na obrascu sadržanom kao Prilog III ovog Pravilnika uz obavezno istovremeno dostavljanje narativnog i finansijskog izvještaja u skladu sa ovim Pravilnikom i zaključenim ugovorom.

Izvještaj se mora dostaviti u roku određen ugovorom potrebnu za njegovu realizaciju, potpisan od strane ovlaštenog lica i ovjeren pečatom.

Izvještaj se dostavlja u zatvorenoj koverti putem preporučene pošte ili lično u službene prostorije Turističke zajednice Kantona Sarajevo.

Član 20.

Subjekt koji ne dostavi u roku i propisanoj formi narativni i finansijski izvještaj o realizaciji projekta a koji je sastavni dio ugovora, Turistička zajednica Kantona Sarajevo će uputiti zahtjev za povrat sredstava.

Povrat sredstava iz prethodnog stava ovog člana vrši se u roku predviđenog ugovorom.

Informacija o subjektima koji nisu dostavili narativni i finansijski izvještaj o realizaciji projekta, odnosno koji nisu izvršili povrat sredstava, objavljuje se na web stranici www.visitsarajevo.ba.

Član 21.

Korisnik sredstava sufinansiranja po javnom pozivu Turističke zajednice Kantona Sarajevo, dužan je da u narativnom i finansijskom izvještaju dostavi:

1. izvještaj o realizaciji projekta i utrošenim sredstvima,
2. foto i/ili drugu dokumentaciju kojom se dokazuje realizacija projekta,
3. dokaz o plaćenim računima izvođača/dobavljača i fakture,
4. izvode iz banke o realizovanim uplatama,
5. dokaz o uplatama drugih subjekata ako je prijavljeno njihovo sudjelovanje u programu.

XIX Način isplate i praćenja realizacije projekta

Član 22.

Sa subjektom kojem se odobre sredstva Turistička zajednica Kantona Sarajevo zaključuje ugovor o sufinansiranju kojim se uređuju: naziv korisnika sredstava, tačan naziv projekta, rok početka i završetka projekta, iznos sredstava koje odobrava Turistička zajednica Kantona Sarajevo i iznos finansiranja projekta iz vlastitih izvora korisnika sredstava, način korištenja sredstava, način praćenja realizacije odobrenog programa, rok isplate, nadzor namjenskog korištenja, vidljivost učešća u sufinansiranju Turističke zajednice Kantona Sarajevo i druga pitanja vezana za realizaciju projekta.

Dinamiku isplate dodijeljenih sredstava za sufinansiranje određuje Turistička zajednica Kantona Sarajevo, i to na način da se korisniku sredstva uplaćuju u tri etape:

1. 50% odobrenih sredstava se uplaćuje u roku od 8 dana od potpisivanja ugovora
2. 35% odobrenih sredstava se uplaćuje nakon izvještaja o utrošku sredstava iz prve tranše, a koji sadržava i utrošak iz vlastitog učešća;
3. 15% sredstava se uplaćuje na račun korisnika nakon dostavljanja finalnog izvještaja za cijeli projekat

Kantona

Pravna i fizička lica kojima su odobrena sredstva za realizaciju projekta dužna su dodijeljena sredstva koristiti namjenski, na način i u rokovima utvrđenim ugovorom.

Korisnici sredstava sufinansiranja, bez obzira na način sufinansiranja, ugovorom se obavezuju da iz drugih izvora neće finansirati iste troškove za koje su dobili sredstva iz Turističke zajednice Kantona Sarajevo i za koja će dostaviti dokumente za pravdanje.

Turistička zajednica Kantona Sarajevo ima pravo zahtijevati dodatnu dokumentaciju i obrazloženja o utrošku sredstava ukoliko procijeni da postoje određene nejasnoće.

Turistička zajednica Kantona Sarajevo može imenovati osobu ili komisiju za nadzor realizacije projekta i uputiti je na teren, tamo gdje je moguće, u cilju nadzora prisustva događaju i praćenja realizacije projekta za koji su dobijena sredstva.

Ako Turistička zajednica Kantona Sarajevo utvrdi nepravilnosti u korištenju sredstava, naložit će povrat u dijelu u kojemu je utvrđena nepravilnost.

Član 23.

Ukoliko iz bilo kojih razloga podnosilac zahtjeva ne bude u prilici da ispuni sve odredbe ugovora, dužan je u najkraćem roku o tome obavijestiti Turističku zajednicu Kantona Sarajevo, a navedena sredstva tada neće biti uplaćena na račun korisnika.

XX Prelazne i završne odredbe

Član 24.

Ovaj Pravilnik stupa na snagu narednog dana od dana donošenja.

Stupanjem na snagu ovog Pravilnika, prestaje da važi Pravilnik o sufinansiranju turističkih projekata u Kantonu Sarajevo broj 416/19 od 02.04.2019. godine.

Predsjednik Turističkog vijeća

Turističke zajednice Kantona Sarajevo

Suad Drpljanin

Broj: 426-4/20

Sarajevo, 15.05.2020. godine

